



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

***Komunikadu Imprensa***

***Distritu Ermera***

***19 Janeiru 2015***

**Suku Eraulo Distritu Ermera foin primeira-vez hetan treinamentu kona- ba asesu ba sistema justisa formal**

Iha 15 Janeiru 2015, *Judicial System Monitoring Programme* (JSMP), fasilita treinamentu kona-ba programa "justisa ba ema hotu" iha comunidade sira iha Suku Eraulo, Sub Distritu Letefoho Distritu Ermera.

Partisipante ne'ebé partisipa iha treinamentu ne'e hamutuk ema nain 30 kompostu husi feto 15 no mane 15.

Objetivu husi treinamentu ne'e maka atu kontinua habelar informasaun ba comunidade liu-liu sira ne'ebé susar atu hetan informasaun kona-ba funksionamentu sistema justisa formal no nia prosedimentu sira.

“Treinamentu ida ne'e hanesan atividade kontinuasaun, ne'ebé antes ne'e JSMP organiza ona iha suku remotas sira atu habelar informasaun legál ba comunidade sira kona-ba asesu ba justisa formal, atu ajuda comunidade sira iha koñesimentu ne'ebé diak kona-ba oinsa prosesu sira nia kazu ka krime tuir dalan justisa formal”, dehan Diretór Ezekutivu JSMP, Luis de Oliveira Sampaio.

JSMP observa katak iha Suku Eraulo seidak hetan informasaun kona-ba asesu ba justisa. Tanba ne'e, através hosi programa ne'e JSMP bele fahe informasaun kona-ba lei no justisa ba iha comunidade, liu liu ba estrutura suku sira, atu nune'e sira bele komprende oinsa rezolve problema kazu hirak ne'e tuir lei ne'ebé vigora iha Timor-Leste.

Sr. Agostino nu'udar membru polisia komunitariu ne'ebé partisipa no representa Xefe Suku Eraulo, iha sesaun abertura haktuir katak nia agradese ba ekipa JSMP ne'ebé bele to'o iha sira nia suku hodi fahe informasaun kona-ba justisa formal. Alende ne'e, nia hatutan katak oportunidade ida ne'e sai hanesan bukae ida ba sira iha futuru, liu liu bele kumpriente kona-ba lei no justisa formal nia funksionamentu iha Timor-Leste.

Durante ne'e comunidade iha suku Eraulo barak mak seidak hetan informasaun ne'ebé naton kona-ba setór justisa, liu-liu kona-ba asuntu violénsia doméstika no oinsa atu halo keisa bainhira akontese krime ne'e. Relasiona ho kestaun ne'e, JSMP liuhosi oportunidade ne'e, mós esplika kona-ba prosesu justisa ba kazu violénsia doméstika no kazu violasaun seksuál tuir provizaun Lein Kontra Violénsia Doméstika no Kodigu Penal aplikavel.

JSMP observa katak participante sira ativu tebes hodi hato'o sira nia preokupasaun kona-ba saida maka sira seidak kompriende durante sesaun sira kona-ba husu no hatan.

Tuir planu, treinamentu hanesan sei hala'o fali iha Distritu Aileu no Suai iha semana dia ne'e nia laran ho apoiu hosi *Embaixada Canada iha Indonezia*.

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

telefone: 3323883/77295795

webiste: [www.jsmp.tl](http://www.jsmp.tl)

facebook [www.facebook.com/timorleste.jsmp](http://www.facebook.com/timorleste.jsmp)

twitter: @JSMPtlss